



政治典訓初集

卷二十五

神武十二

平定厄魯特



政治典訓初集卷第二十五

神武十二

平定厄魯特

○八月壬辰。理藩院員外舍稜奏。厄魯特降人莽柰言。噶爾丹尚住塔米爾。召阿拉卜灘。議往翁金。掠其界上人。取糧以往哈密。丹濟拉等不從。故無定議。阿拉卜灘丹津俄木布。不願往翁金。故兩人叛去。噶爾丹丹濟拉土爾伯特之車陵伊拉古克三庫

畜克畜俱同住塔米爾。人俱怨之。

上以示議政諸臣。

○癸巳。先是郎中滿都。密報回回國主阿卜都里什特。及其子。自厄魯特來降。願留子媳諸孫于此。身攜其妻往土魯番。宣

上威德。謀擒噶爾丹。以報我父子十四年之辱。上命召至京。且傳

旨。令妻子諸孫一同遣歸。不必留此。

○癸卯。侍讀學士喇錫奏。噶爾丹實往顏塔。臣等暫留憨山候其聲息。

○庚戌。大將軍伯費揚古奏。噶爾丹自塔米爾前徙八日。于七月二十五日。至俄羅海腦兒駐扎。

○九月丙辰。

諭大將軍伯費揚古曰。頃噶爾丹地方逃來人言。迫於饑凍。此大機會。

上天眷佑。授我之象。不可復失。爾等益當加意。前
朕親至克魯倫時。若爾等兵能趨行三日。到
巴顏烏闌左側。噶爾丹何能得脫。設商南多
爾濟來後。或以所到之地。奏聞一次。或朕所
遣殷扎納額林辰等。于十三日前到。則朕何
故回師。因爾軍斷斷不到。俱至饑餒。故回師
調撥軍餉。然而脫出如許人。降者逃回。誠不
料及此也。此等事。至今追悔無盡。爾兩大

將軍相會之時。朕軍中馬甚壯。理當選擇。換
馬追之。收取離散之人。其時雖散。因無人收
之。故一一聚而成羣。宜矣。今爾等成羣如何。
噶爾丹形勢如何。朕因懸隔。急欲聞之。特發
手書往諭。

川陝總督烏赫。奏報哈密回子頭目額貝
杜拉達爾漢白克遣人進

貢來降。

○丙寅。大將軍伯費揚古奏。噶爾丹戰敗。乏食。窮困已極。謂滿兵俱已回京。喀爾喀等必出塞游牧。可乘此隙。取糧於喀爾喀。以度此冬。故使丹濟喇等。率兵一千五百南來。既到阿濟爾布都納地方。丹濟拉聞聖上遣兵堵禦邊汛。遂紛紛遁去。

○壬申。

上復巡行北塞。經理軍務。是日發自京師。

○乙亥。以招撫噶爾丹丹濟喇

勅書。印刷蒙古文三百道。遣理藩院主事丹巴。

賚發大將軍費揚古。令其頒示。

勅曰。朕統御寰區。中外一體。效順者必撫綏以生之。梗化者必誅勦而滅之。爾於烏闌布通。雖大敗逃遁。朕仍欲與爾期約。定喀爾喀之事。幾經發勅遣使。爾等背誓。掠納木扎爾陀音。直犯克魯倫。朕乃親統六師。遣使諭爾。期

會定約。爾狐疑不信。不見我使。朕抵克魯倫。爾不能抗威遁去。遇我西師。爾先逆戰。至於大敗。士卒死亡。盡棄馬駝牛羊子女廬帳諸物遁走。衆寨桑台吉等人。絡繹來降。丹濟喇格壘古英車陵奔。遣其察罕哈什哈。亦來請降。朕已面許之。遣使歸去。今朕復統軍而出。各處亦調兵為備。爾等既失妻子馬畜什物。無衣無食。窮困已極。更無所之。天時漸寒。死

在旦夕。朕不忍視爾屬衆妻子。仳儻凍餒而死。特降勅招撫。爾等果悔前愆。能來歸命。朕不分異同。無不眷養。俾得其所。爾屬下衆人。亦得見其妻子。各安其生。朕斷不計爾後作之孽。倘猶迷而不從。試熟籌爾等長久之策。有能收納汝等而活之者乎。爾等已無所歸。各當來降。朕必使爾富貴。咸得其所。毋疑毋懼。特諭。

○丙子。主事巴什納奏。副都統祖良璧。恭將張憲載。率滿洲綠旗兵在翁金守米。因天寒。軍士難以久屯。馬匹凍斃者多。遂以現存之米。分給兵丁。餘皆焚燬。前鋒當前。輜重居中。副都統等親身殿後。九月初六日。自翁金起程。行五六里。忽有蒙古五六人。闖入我軍輜重行劫。我軍前鋒。遂至西方山谷中。忽有蒙古兵。自谷中大呼而出。發

鳥鎗弓矢。來逐我前鋒。及于輜重。防護之兵。與之接戰。又入副都統陣中。相與混戰。蒙古兵大約千餘。是否噶爾丹兵。未之知也。

○辛巳。

駕出張家口。駐蹕察罕拖羅海。大將軍伯費揚古。復報厄魯特降人阿玉什言。丹濟喇自伊扎爾布都納。往趨翁金貯米之地。本月

初六日早。見翁金兵起行。我等藏匿。俟其少過。丹濟喇率我厄魯特往攻。欲奪其行裝馬匹。而輜重後殿兵。發鎗砲接戰。輜重前導兵。復返而夾擊。我厄魯特敗。向西而走。丹濟喇出。大悔曰。欲向清水捕魚。徒攪水渾而不得魚。今柰何。馬俱羸瘦。步行者多。

上諭內大臣蘇爾達等曰。前以祖良璧被厄魯

特掩擊糧米食物。朕甚憂之。噶爾丹為我軍所敗。但存坐馬衣服。奔竄而出。食盡衣單。漸及寒凍。勢在必亡。雖獲米糧什物。能存几日。有何大濟。第目下丹濟喇請降。而又劫米。彼既得糧食。其降尚少遲。朕深憂之。今將軍費揚古報祖良璧擊敗厄魯特。朕甚喜悅。噶爾丹今已困極。雖不進討。亦必滅亡。今但以招撫為要。是以朕命大將軍頻遣噶爾丹下人

往招之。頻遣其人往招。則噶爾丹雖不降。其
下必散。自來歸降矣。又

諭大將軍伯費揚古曰。朕覽奏。知祖良壁擊敗
厄魯特。不勝欣慰。此軍克捷。固不必言。即或
不克。噶爾丹一無所獲。舍散之外。更有何法。爾
但以招撫為要。使之散盡。勅文及招撫事件。
已令本什等轉致。不必更及。但好言誘入我
掌握中。當另畫一策耳。

尚書班第奏言。喀爾喀多羅貝勒根敦額
爾克帶青之青寨桑。來至臣所。言去歲噶
爾丹至巴顏烏蘭。我等被彼阻截。住居塞
稜格之布隆哈地方。噶爾丹遣二十人往
烏郎海征賦。止而殺之。續有噶爾丹下阿
海納青等十人逃來。又殺之。又有噶爾丹
屬下烏郎海等二百餘戶。俱降之。今年七
月間。擒厄魯特問之。言噶爾丹被大兵擊

敗。率三十人而逃。從庫克納塔爾哈。趨抗
愛山。其下離散者。追而及之。與之復會。其
兵僅二千。除坐馬外。更無餘馬。其牛羊糧
食住房全無。自相竊奪馬駝為食。丹津依
木布阿喇卜灘。與之不睦。分路而行。噶爾
丹率其黨羽。踰抗愛山。由庫冷白兒齊爾。
趨塔米爾塞欽。向西而去。

上諭議政大臣曰。根敦帶青。久無音耗。朕甚念
之。今遣使來奏。又在意外。剿撫噶爾丹之人。
則噶爾丹之滅速矣。今事已竣。朕心大慰。卿
等亦必喜悅也。着諭來使。如擒獲噶爾丹。勿
得生獻。即在其地立決。

○壬午。

上諭內大臣蘇爾達曰。據厄魯特降人言。噶爾
丹往博羅烏納罕等處地方度冬。今丹濟喇
往就之。所云博羅烏納罕者。乃扎薩克苗汗

舊居之地。距喀倫有四十餘日之程。大將軍費揚古所率右衛兵。必不能到其地。殆至翁金。因馬疲而還。噶爾丹業已盡破。何以不深筭剿滅之策。而徒勞人馬乎。當速檄大將軍不必進兵。至來年草青。秣馬以待。視噶爾丹所往。剿而除之。此際當頻遣厄魯特降人招撫為要。

○癸未。

上駐蹕海柳圖。

諭尚書班第曰。不可往歸化城。遣人于俄爾多斯。令彼左翼三旗。調兵二百。至黃河對岸以待。

○十月甲申朔。

上率諸皇子射。連中五矢。

諸皇子皆屢中。喀爾喀及蒙古諸王台吉。與厄魯特降人。無不驚服。

上顧諸王大臣曰。今日喀爾喀厄魯特皆在。朕直論其事。彼皆向來貢獻本朝之國。兩國交惡。其曲不在厄魯特。而在喀爾喀。喀爾喀先犯厄魯特。喀爾喀理曲。是以其國為厄魯特所破。但厄魯特假伐喀爾喀為名。進我境內。烏闌布通之地。為我師所敗。已誓不復侵喀爾喀矣。今又背誓。入犯我邊汛。屯於克魯倫之地。則厄魯特理曲。是以朕親統六師滅之。

天道昭然。毫髮不爽。朕為天下萬國之主。寧有偏徇之理乎。朕所以破厄魯特者。非為喀爾喀也。喀爾喀諸王。及厄魯特降人。皆跪而奏曰。此等曲直。臣等向愚昧不知。今蒙皇上申明大義。方知兩國致敗之由。此實我等所自取也。

○丙戌。

駕至胡虎額爾奇。

○丁亥。

上駐蹕昭哈。

○戊子。

駐蹕河約爾諾爾。

諭議政諸王招撫伊喇古克三庫番克番。

○庚寅。

駐蹕胡魯蘇台。

○甲午。

駐蹕喀喇河朔。

○丙申。

駕自白塔至歸化城。

○丁酉。

駐蹕歸化城。

○辛丑。

上諭曰。噶爾丹窘迫已極。必亡命走哈密。着檄孫思克。率所部兵赴肅州。至阿南達處預備。

將軍博濟。於西安兵內未行者。選人材偉健者二千。亦赴阿南達處。探往哈密聲息。即行剿滅。

○甲辰。

遣曼濟歸。先是擊敗噶爾丹於昭莫多之地。有

厄魯特曼濟受傷被擒。曼濟以其妻子皆在噶爾丹所。求歸。

上命遣之。且撰蒙古文。

勅諭噶爾丹丹濟喇等曰。朕統御天下。要以中

外一體為務。往者烏闡布通之役。爾等雖經

敗北。朕尚欲與爾等會約。以定喀爾喀之事。

故使命屢頒。爾等乃違棄誓言。搶掠納木札

爾陀音。竟至克魯倫地方。朕親帥師。欲與爾

會同定議。遣使申諭。爾復狐疑不信。不親見

朕使。及朕躬至克魯倫。爾遂望風奔潰。遇朕

西路之兵。爾先犯我顏行。遂至喪兵敗衄。盡

棄馳馬牛羊子女廬帳什物。爾衆寨桑台吉等。接踵來降。丹濟拉格壘古英車陵奔等。寨桑十五人。亦願歸服。遣察罕哈什哈來。陳奏悃誠。朕已面諭遣還。今朕又親率六師。遠蒞于此。且各處調兵邀截。爾等妻子馬畜諸物。俱已散亡。衣食已盡。勢迫無歸。况時漸嚴寒。朕不忍爾屬下厄魯特妻子相失。窮困凍餓而死。特遣諭招撫。今重復降勅。爾等若悔前

愆。俯首向化。朕一體加恩撫恤。俾各得所。爾部下厄魯特亦得妻子完聚。咸獲生全。朕斷不念爾前罪。况爾部落人內。有被我軍所俘。其父母妻子尚在爾處。不忍分離。願歸故土者。朕皆恩賚。賜之坐騎糗糧。即令遣歸。使與其骨肉完聚。其欲內附不願歸者。朕皆富貴之。各得生養。爾部人曼濟重傷。為我軍所擒。今曼濟言其妻子尚在爾處。曰欲告歸。朕是

以給之恩賞。賜以坐騎糗糧。使賫勅遣回本
地。爾等思倘能永存。有能收養爾等之人否。
其熟籌之。今已無所歸矣。爾等可速領餘衆。
抒誠歸順。朕必令爾等家富身榮。各遂生養。
惜此厄魯特如許生靈。被爾驅迫。至於此極。
今又不覺悟。聽信匪言。則後悔莫追矣。爾其
勿疑勿懼。特諭。

○丁未

命減

御膳。賜右衛官兵食。

○己酉。

命發勅招撫厄魯特。台吉阿喇卜灘丹津俄木
布曰。朕統御天下。撫恤黎元。務使人人各得
其所。先是爾厄魯特。與喀爾喀。互相仇怨。朕
欲爾等和好。故頒勅諭。喀爾喀厄魯特。俱違
朕諭。自起戰爭。喀爾喀既敗。來歸。朕為天下

元后。不恐坐視其滅。是以納之。注其名籍。酌量封為王貝勒貝子公扎薩克。與以厚祿。咸致富貴。俾各得所。噶爾丹博碩克菴汗。乃不願朕拯救天下生靈。藉喀爾喀為兵端。闖入烏闌布通之地。既為我兵所敗。雖詭誓遁逃。朕猶數遣使頒諭。令其會約。以定喀爾喀之事。噶爾丹博碩克菴汗。違背誓言。掠納木札爾陀音。越克魯倫而前。朕親統大軍。欲與會

約。特遣使直告。噶爾丹博碩克菴汗。狐疑不信。奪朕使馬。不與相見。及朕親至克魯倫。即望風敗遁。遇朕西路官兵。彼先逆戰。遂至大敗。子女牲畜。盡被俘獲。丹巴哈什哈等。先來抒誠。後沙克朱木等。接踵歸附。俱給以官職。令之貴顯。足其衣食。使之富有。固已各得其所。其來降之衆。內有子女被我兵所俘者。皆行察出。令其父子兄弟夫婦完聚。今朕又親

統六師。各路皆已調兵阻截。噶爾丹博碩克
菑汗。倘不來降。必窮之於其所往。爾阿喇卜
灘丹津俄木布。前雖附噶爾丹。然皆非倡亂
之人。今歸降之人。皆云爾等與噶爾丹分柝
各居。朕嘉爾猶知天道。能自振拔。憐爾之馬
畜等物被擄。衣食已絕。特遣和碩扎薩克菑
親王之長史馬尼菑。多羅郡王昆都倫博碩克
圖之烏勒木濟。多羅郡王墨爾根濟農之阿

玉西。又爾屬下之喇嘛羅卜臧班珠兒。亦願
招安爾等。今同持諭前往。其扎薩克菑汗之
子。先經離散。朕已收留。覓爾岳母。令與相會。
封為親王。食以厚祿。頻加撫恤。頃又賜以牛
馬羊羣。擇地令其游牧。使之得安生業。享有
富貴。此顯然之明驗也。勅書一到。着即率爾
部落來降。前此依附噶爾丹博碩克菑汗之
各。朕概不介意。必待爾以富貴顯榮。爾之部

落。亦使各安生業。妻子完聚。從容度日。丹巴
哈什哈等。朕尚憐恤。使之富貴。况爾等乎。若
爾尚有疑懼。今春策旺拉卜灘之使來時。稱
爾與策旺喇卜灘甚善。若臧噶爾丹。請勿討
阿拉卜灘。今彼與我會合。且策旺喇卜灘。屢
遣使納貢。敬慎有加。故朕亦深加憐惜。爾若
同丹津俄木布。往附策旺喇卜灘處。朕亦不
窮詰。爾其優禮朕使。明白回奏。倘於此二者。

不審一自處。徼倖於厄黑阿拉爾空屋。賴齊
斯希等峻險之處。棲身苟免。斷不姑容。必會
同策旺喇卜灘。根敦帶青貝勒等。剋期進討。
爾其早作良圖。特諭。

○庚戌。

駕至麗蘇村。

○辛亥。

駐蹕湖灘河朔。閱黃河。濶五十三丈。即土人所

稱脫脫城也。自歸化城至黃河岸。一百七
十里。

○十一月戊午。

駕至喀林托會。

○己未。

上渡黃河。駐蹕東斯垓。

○壬戌。

駕至察罕布喇克。

○甲子。

駐蹕胡斯泰。

○乙丑。

駕次華拖羅海。

○己巳。

駕至浙固思台。

○戊寅。

駕自胡斯泰啟行。噶爾丹之使格壘沽英至。

上行中途引之近前。

諭曰。朕為天下元后。萬國一家。今日科爾沁諸王貝勒台吉。及喀爾喀厄魯特。皆在此。朕將公論之。喀爾喀厄魯特。向皆職貢本朝之國。朕並無所偏徇。喀爾喀土謝圖汗。執喀爾喀扎薩克圖汗而殺之。又殺汝主噶爾丹之弟。此喀爾喀之罪也。喀爾喀後為爾國所敗。而來歸朕。朕憐彼十萬餘身命。失其生路。受而

養之。凡有人急迫而來歸朕。朕皆收養。無分彼此。不但喀爾喀已也。即爾厄魯特。今為敵國。有來降之人。朕皆恤之。使各得其生路。量材授之官職。雖俘擄之人。皆贖其妻子。完彼骨肉。朕豈有喀爾喀厄魯特之異視乎。前以噶爾丹無故闖入我境。侵內地蒙古。朕遣兵敗之於烏闌布通之地。爾主噶爾丹窘極遁逃。立誓不復犯邊。朕向以至誠待人。故不遣

兵窮追爾主噶爾丹。逆天背誓。離其故巢。至我克魯倫之地。掠納木扎爾陀音。朕乃不得已。統軍而出。然仍再三遣人。約噶爾丹會盟。修好。此朕不嗜殺之心也。爾主不自引罪。朕始整兵進討。爾主噶爾丹不能抗朕之威。日夜奔逃。遇我西路預堵之兵。仍因汝噶爾丹先我攘臂。我師乃進戰。大敗之。汝今窮困至此極者。皆汝所自取也。朕曾往陵之否。爾來

為使第公言之。毋隱。格壘沽英初與諸大臣言。猶支吾巧辯。及聞

上諭。傾心降服。叩首奏曰。誠天下之

聖主也。語皆迥異。我厄魯特無知。但貪得喀爾喀子女財物。今

聖上闡發大義。始知

天意無私。及我厄魯特之罪矣。現有沙克朱木諾爾布等人。皆近日來降。較在我國時。更

加榮顯誰不願歸

洪仁之內。吾主亦不日與喀爾喀同列矣。
上顧謂近臣曰。此言甚公。雖外國人亦知理也。
蒙古諸王貝勒台吉。跪而奏曰。
皇上諭旨。炳如日月。噶爾丹昏迷無知。不從仁
化。自取其死而已。

○已卯

駐蹕東斯垓。

上諭議政諸臣曰。天下當以仁感。不可徒以威
服。今朕原無征噶爾丹之意。皆噶爾丹之所
自取。朕亦何有成心。且噶爾丹兇暴。朕惟待
以寬仁。噶爾丹狡詐。朕惟示以誠信。常覽經
史云。惟仁者無敵。今噶爾丹窮迫已極。遣格
壘沽英來乞降。朕意仍欲撫之。諸臣奏曰。此
真天地好生之心。實從古所未有也。
上又諭曰。古之將帥。雖善用兵。多戮已降。或其

身不得善終。或子孫不昌。此皆好殺之明戒也。又古之人主。或窮兵黷武。好大喜功。朕意不然。惟願宇宙雍熙。四海昇平。家給人足。各得其生而已。故今仍欲遣格壘沽英回噶爾丹處。再差司官一員。筆帖式一員。賫勅往撫噶爾丹丹濟喇等。可速撰勅呈覽。

勅曰。前者遣察哈代。又遣曼濟。勅諭爾等。如引罪來降。則朕並無異視。概加矜恤。務使得所。

爾屬下厄魯特。亦得見其妻子。各安其生。朕斷不念爾等過惡。當詳計之。有能收養汝等之人否。今已無所歸矣。爾等其率所餘厄魯特。作速來降。朕必使爾等富貴。各得其所。今若仍不悔悟。聽信匪人之言。後悔難追。毋疑毋惧。亦以明白開諭汝等矣。今爾噶爾丹丹博碩克。番汗。丹濟喇。又遣格壘沽英來奏曰。蒙大霽恩綸。不勝歡忭。意必大加恩恤。故遣格

壘沽英覆奏。朕以諸事詳示格壘沽英。遣之歸去。前二次遣諭爾等。勅內開載甚明。但遵前旨。速降之外。更無別旨。特諭。

○庚辰。

駕次黃河西界薩爾虎拖會。

○十二月甲申。大將軍伯費揚古至自軍。

上命入行宮。與語良久。續使議政諸臣俱前。

諭曰。朕謂噶爾丹。乃熟於戰陣之狡寇。滅之必

需時日。孰意一戰。立至敗亡。前者費揚古言。

西路兵四月二十四日。可至土喇。二十七日。

可至巴顏烏闌。故朕即統軍前進。後杳無聲

息。在察罕布喇克。待之數日。果西路兵如期

而至。兩路夾攻。則噶爾丹之兵。一人不能脫

矣。其時諸王大臣。尚欲待之於拖陵。朕計西

路兵。今將到土喇。朕軍不可不前。遂統軍疾

進。雖噶爾丹懾我軍威。潰遁。而西路以疲困

之衆。遇敵戰勝。勢如破竹。實為可嘉。費揚古奏曰。臣軍中機務。皆遵

皇上指授。手書密諭而行。並未能別出意見。有所効力。况西路兵已糧匱馬乏。不能前進。及聞

駕至克魯倫。官兵無不奮發。齊言

皇上出自深宮。尚先至敵境。我等其可緩乎。故不待催迫。冒死前進。不俟督責。奮勇克敵。

若非

聖駕預臨。無論滅賊。即臣身命。亦不可保。噶爾丹破敗。皆

聖謨神武之所致也。柰臣庸劣。以

皇上窮困之寇。不能生擒獻之。實臣罪也。

上顧費揚古曰。噶爾丹被我軍擊敗後。散者散。降者降。是以朕親臨塞外。相機行事。今觀陸續降人。及格壘沽英之言。噶爾丹窮蹙是真。

朕意悉加屠戮。不如撫而活之。故爾未至之前。朕即降旨招降。費揚古奏曰。

聖意迥出非常。真天地好生之仁。臣意宥罪之詔既下。噶爾丹必降矣。

○乙酉。

駐蹕湖灘河朔之南。以

御佩橐鞬弓矢諸物。

賜大將軍伯費揚古。

是日。伊拉古克三庫圖克圖遣人奏曰。臣昔在

太宗皇帝時。少効微勞。得蒙

恩旨。許以世世加恩。是以留傳宗派。後奉達賴喇

嘛法旨。往歸

天朝。微軀得蒙寵卹。詎意惡徒彭素克格隆。賄

通大臣。虛詞捏告。大臣不辨曲直。斥逐臣

身後蒙

皇上寵臣。為喀爾喀厄魯特不和之事。奉差出使。臣罔惜身命。竭蹶

王事。緣不獲分明。遂有往皈西方之想。博碩克圖汗奏于達賴喇嘛。携臣而去。臣欲遣使奉聞。而未能。去歲意欲往見

欽差使臣侍衛克什圖。而臣所居遼遠。不得訴

臣衷曲。仰仗

皇上如天之仁。一惟

諭旨如何。請遵

旨而行。

上諭曰。伊拉古克三庫圖克圖。自西域來。朕待之有加禮。想內不自安而去。今可作速來歸。彼乃喇嘛。朕不介意。當待之如初。

○己丑。

上諭戶部曰。朕惟治天下之要。惟以久安民生為急。顧欲安民生。必除寇虐。欲除寇虐。必事師

旅。方今寰宇昇平。人咸樂業。獨厄魯特噶爾丹。狂逞邊塞。荼毒生靈。朕思為邊境人民。永絕後患。故特發大軍。分道進剿。朕躬不憚勤勞。今春親統中路大兵。深入無水草之地。直抵拖諾。比噶爾丹聞朕親臨。盡棄輜重。倉惶宵遁。適與西路大兵相遇。大敗潰散。俘其人。其寨桑等。來歸者甚衆。而噶爾丹收遺寇千餘人。仍竄伏于枯倫白爾齊爾等處地方。

朕於冬月復統軍出邊。相機剿撫。駕抵鄂爾多斯。於是厄魯特人民。來歸者絡繹相屬。噶爾丹力窮勢蹙。亦遣格壘沽英具奏乞降。隨經頒示勅諭。許其歸順。惟是噶爾丹狡詐叵測。其果否來降。猶未可定。仍當厲兵秣馬。待來歲出師。撲勦務絕根株。比年以來。軍前需用馬匹。在大同府屬牧養者甚多。措辦草料等項。雖俱支用正項錢糧。而供億浩繁。殊勞

民力。但必此賊盡滅。然後邊外蒙古。得以安寧。而在內生民。亦獲休息。師旅之興。大非得已。該郡官民。當各勉力急公。勿以煩苦為念。朕茲邊外。返蹕雲中。深軫民力之艱。用沛特恩。以示寬恤。康熙三十六年。大同府屬州縣。衛所應征地丁銀米。著全與蠲免。俟噶爾丹殄滅之後。朕自誕布德音。渙敷麻澤。爾部即行文該撫。通行曉諭。俾咸悉惠愛黎元至意。

○丁酉。諸王發馬迎駕。

上騎而行。

顧大學士張玉書等曰。朕所乘馬。乃哈薩克國之馬。噶爾丹得之。為我軍所敗。我軍得之。朕乘而試之。其汗如血。古所稱大宛汗血馬。想即此也。張玉書等曰。史稱大宛馬為天馬。其汗赤。行可追風。以為祥瑞。入于樂歌。臣等

未見。常謂之虛言。今
聖上乘之。觀其汗相符。苟非德威遠播。何易得
此非常之馬乎。

○壬寅。

駕還京城。命察噶爾丹現在所居通金地方路
程。阿南達奏。自寧夏至翁金河。二千一百
餘里。自翁金至薩克薩特呼里克。一千餘
里。薩克薩特呼里克。在什爾哈之南。喀喇

阿濟爾罕山陽。自翁金而什爾哈。而通金。
而薩克薩特呼里克。又自嘉峪關至哈密。
二十日可到。巴爾呼爾。在哈密之東方。至
此與至哈密同。自巴爾呼爾。至薩克薩特
呼里克。第九日可到。

